

CONSTITUCION DI ARUBA TA SER TRATA MAÑAN DEN EILANDSRAAD

Oposicion no ta contento cu tratamento di reunion domestico diavierna

ORANJESTAD(AAN)—Mañan ta ser trata den Eilandsraad e concepto di constitucion pa Aruba, tambe e concepto di ley pa cooperacion entre Aruba y Antillas di cinco y tambe e cambio nan den reglamento di orden di parlamento.

Manera ta conoci, e partidonan di oposicion no ta mucho contento cu

e manera cu e desarollo nan prome cu a yega asina leeuw a tuma lugar.

Te den laat diavierna ultimo a delibera den reunion domestico, sin presencia di lider di MEP Sr. Betico Croes, kende lo ta sufrí di quebrante di salud, segun Diputado Gracie Bareño a laga sa.

Partidonan di oposicion a haci un cantidad di pre-

gunta, pero no a keda satisfecho cu e contestanan cu a ser haya. Tratamento di constitucion a dura varios ora debi na e dialogo cu a ser teni entre miembronan di parlamento y Bestuurscollege.

Di parti di oposicion nan no a keda satisfecho cu e tratamento indicando tambe cu di parti di MEP tabata falta interes

pa e reunion debi na ausencia di lider di MEP y di varios miembro di parlamento di MEP. E unico nan di oposicion cu no tabata presente tabata e independentenan Felix Flanegin y Adri de Palm.

For di e cantidad di preguntanan lanza por a riparasin embargo cu Bestuurscollege ta prepara pa e reunion di mañan.

Di PPA ta conoci cu nan no ta contento cu e punto di reglamento di orden cu mester ser trata mañan ya cu nan ta haya cu e cambio lo implica cortamento di libertad di expresion den parlamento y nan no ta satisfecho tampoco cu e punto di agenda ariba cooperacion entre Aruba y Antillas di cinco.

BONAIRE LO POR PAGA ARUBA Y CURACAO BACK DEN FUTURO

Si awor Hulanda yuda Bonaire financieramente segun Jopie Abraham

ORANJESTAD(AAN)—Den su conversacion cu prensa, Sr Jopie Abraham Consehero General di Bonaire a duna di conoce cu Bonairianonan ta preocupá pa e situacion actual na Antillas y cu den e stadio aki no kier papia mes di independencia.

El a duna di conoce cu bonairianonan ta preocupá tambe cu perdemento

di pasaporte hulandes.

En coneccion cu esaki el a laga sa cu Eilandsraad di Bonaire unanime a aproba un mocion pa por tin lazonan estrecho entre e seis islanan di Antillas pero si un di e islanan sali, Bonaire ta desea di tin lazonan estrecho cu hulanda.

Hulanda lo mester carga consecuencia di colo-

nialismo y desintegracion di Antillas. Hulanda lo mester duna Bonaire awor e ayudo extra, te na 1988 pa asina Bonaire por drecha su economia.

"Mi kier bay mas leeuw ainda. E ora ey e economia di Bonaire lo ta asina fuerte cu Bonaire lo por paga back su debenan na su rumannan Aruba y Curacao cu den tempo di

Antillas di seis semper a yuda nos", el a laga sa.

Segun Consehero General di Bonaire, apesar

cu bonaire nunca tabata tin un refineria ceraménto di Lago y Shell a ser sinti na Bonaire tambe.

Segun SEPA:

PARCE CU SHELL A COMPUTERIZA FECHA DI CERAMENTO CU LAGO

ORANJESTAD(AAN)—Segun presidente di SEPA si mira e cantidad di tempo cu falta pa termina 1985 y mira e cantidad di trabao cu ta dilanti porta y para un rato keto y pensa, por compronde cu hasta por resulta cu tin trabaoonan cu lo no wordo realiza.

„Mirando e desarollo di ultimo dianan caminda tur focus ta ariba e desenlace di refineria Shell, nos por compronde cu tempo pa gobernantenan por dedica na tur trabao cu ta pendiente, mester ser poni den ambiente cuestionable", presidente di SEPA Mario Tromp a laga sa ayera.

Den mesun rosea cu Exxon a pone su posicion pa termina su funcionamiento na Aruba, dia 31 di october, por a mira cu Shell tambe a posiciona su mes den e forma cu e

multinacionalnan ta trece nan posicion dilanti manera ta computeriza nan ta funciona mencionando tambe ceramento di Shell pa 31 di october.

El a laga sa cu SEPA conoce e daño cu a ser laga atras na Aruba y cu kizas tambe esaki lo sode na Curacao. Por compronde kico lo ta e consecuencianan y esaki ta cu ta e clase trahador ta esun cu lo mester carga tur locual ta mara na decisionnan di companianan asina.

"SEPA a fada di tende relaciona cu e desenlace cu a tuma lugar na Aruba caminda Exxon a anuncia su ciere y te ainda ta tende cu lo por bin un reemplazante.

Pakico e mes lugar y reemplazante mientras cu na multiple ocasion a tende cu e compania cu a Sigui lesa pag. 13

AVP A PROPONE PA HACI MIEMBROAN DI GOBIERNO CASTIGABEL PA MANIPULACION

ORANJESTAD(AAN)—Den e reunion domestico cu a ser teni diaviera y cu a dura te madrugada encuanto concepto di ley pa constitucion, entre e varios proposicionnan di cambio cu AVP a trece dilanti, tin tambe esun pa castiga miembronan di gobierno cu haci nan mes castigabel na manipulacion.

E proposicion cu AVP a bin cune ta pa introduci e sistema Latino di haci miembronan di gobierno castigabel pa actonan di manipulacion cu patrimonio di pueblo.

Na Merca y Estados unidos segun Sr. Henny

Eman a splica, e reglamento aki no ta necesario pasobra e nivel di sentimentu pa normanan di etica/moral ta halto.

Aki na Aruba ni sentencia di juez no ta wordo respecta door di gobernantenan, pesey mester bin articulo den constitucion pa habri e posibilidad pa por persigui y castiga gobernantenan cu ta manipula cu placa di comunidad, segun Sr. Henny Eman a splica.

El a duna di conoce cu AVP lo haci su maximo esfuerzo pa e regla aki wordo ancla den nos constitucion y AVP ta

considera cu ora papia di e rais di organizacion, mester tin reglá den dje e puntonan di vital importancia pa desarrollo sano y democratico.

Den e reunion mañan AVP lo bay haci tur esfuerzo pa convence e miembronan di e fraccion cu ta sostene gobierno pa tuma over e proposicionnan haci door di AVP.

"Aceptando e reglanan door di cual por castiga gobernantenan cu di un manera ilegal a manipula cu placa di pueblo, nos lo ta ariba e caminda cu pueblo ta desea di mira su gobernantenan", Lider di AVP a laga sa.